



683.12
255

謙山行年錄



熊氏贈祖考紹鳳公生於南昌夏溪三世孤傳飄泊鉛山之河口婚贅章宅章亦南昌人無子以女歸贈祖贈祖歿遺五孤贈考最幼時方九歲家無恒產章太夫人惇惇自守或諷以改適太夫人泣曰吾五子如椒五粒豈無辣者不辣廟灣渡頭清流可潔身逝也贈考晝則拾薪夜佐母工衣履不完出爲鄰童侮不敢向母訴太夫人性嚴而介勺水撮鹽未嘗輕受於人贈考凡四兄伯業儒無成仲季皆失業惟叔服賈

以故皆貧贈考恒以備奉母又分三之一以給諸兄
曾入厠拾遺金徐俟主者還之年二十有五生計少
裕娶於陳四十尚乏子嗣陳妣勸納生妣金焉

雍正十二年甲寅金太夫人夢有雲龍雨澤之兆十二
月初五日寅時枚生譜名朝輝

乾隆四年己未六歲春贈伯考續娶黎氏贈祖妣病篤
解誦普陀佛號贈祖妣卒享年七十有九三月枚入
塾弟贊生

五年庚申七歲冬贈伯考生子庚壽譜名朝炯

六年辛酉八歲夏六月弟敬生十月贈考五十初度贈
祖妣靈几在堂泣不介壽

八年癸亥十歲春堪輿汪文超晒有五珠山塋地先大
夫購之誼是冬四癸亥日時下窆山距河口二十餘
里諸父以路遠不命往日將晡告兩贈妣心動思視
葬令僕伴往若有掖之行者日未落抵山諸父日不
可以十歲幼孩視之

九年甲子十一歲受經於張義門先生諱僕字秀臣
十一年丙寅十三歲秋聘莊太學熙臣公第四女

十二年丁卯十四歲授左史漢唐宋書夏贈伯妣黎氏
卒遺孤甫八歲贈妣金太夫人攜歸撫之

十三年戊辰十五歲義門先生疾侍醫藥先生尋卒先
大夫任殯葬事

十四年己巳十六歲贈伯考年老多病臥牀簣二載飲
饌湯藥先大夫令兩贈妣躬親省視冬病卒炯十歲
遺命先大夫撫教成立是年枚失學

十五年庚午十七歲受業王毅庵先生諱輝秋莊夫人
來歸

十六年辛未十八歲肄業斜嶺又失學秋七月長女生
冬十月先大夫六十初度

十七年壬申十九歲肄業城南湖山寺每念祖妣五椒
矢志父年逾六旬比年失學非計也一日步至寺外
影鷺池見鷺湖三峯北峙倒影池中徘徊於天光池
影中覺天地間何以曠然有我歸見先大夫請仍從
毅庵先生學許之詰朝抵縣謁先生致先大夫意先
生納來歲聘是年始改今名字汝條

十八年癸酉二十歲正月負笈城北暇樂園從毅庵先

生受戒規五道聽塗說爲暴棄病根居食安飽爲富
貴熱中俗根輕世傲物目中無人爲狂妄根損人利
己不肯吃虧爲殘忍孽根黨同伐異爲門戶禍根學
課三有物有則傳信闕疑爲擇執要功近裏著已爲
反求要功行得去信得過爲篤行要功枚往復尋繹
問曰抱殘守闕疑豈可闕近裏著已涉世隔礙信得
方行得未信行去如何信得過訓曰大經大法傳信
所在殘闕者編簡魯魚博之可資多識闕之可免附
會穿鑿與傳信經法原不相礙近裏著已克念作聖

罔念作狂強恕而行在家無怨在邦無怨豈礙涉世
學祇口說算不得學這就是道聽塗說暴棄的病根
篤信在心內主忠信這便是策行工夫行得去方算
行到行不去便是所行不是如何信得過爾且先求
行得去行到這裏信到這裏枚索性不羈任膽識甫
受戒課如束羈勒二三年後始漸馴擾就範改字爾
調號蔚亭

二十年乙亥二十二歲春從毅庵先生遊暇樂園問曰
性與天道旣曰言如何不可得聞答曰無隱乎爾言

文章便是言性道不可把內外看成兩橛子貢然多
識是得聞文章的明證又曰非歟是不可得聞與得
聞性道的明證枚敬受教

二十一年丙子二十三歲春學使張公映辰按臨廣信
考入縣學弟子員毅庵先生假城北潘氏別墅開講
席柳池環綠南列館舍北開講堂上有藏書樓明窗
四達鶯麓朱陸講學地咫尺可攀如聞警欵秋先大
夫攜枚偕毅庵先生赴鄉闈闈後先大夫攜枚回夏
溪劉城謁祖壘復至省垣旋歸

二十二年丁丑二十四歲五月長子墀生譜名憲墀

二十三年戊寅二十五歲歲考補增廣生

二十五年庚辰二十七歲赴秋闈是年七月贈伯考遺

孤燭歿

二十六年辛巳二十八歲春學使謝少司寇溶生歲試

一等一名補廩膳生秋聘饒太學天球次女爲墀婦
冬十月稱先大夫七十壽觴

二十七年壬午二十九歲十月次子培生譜名憲培

三十年乙酉三十二歲春科試一等三名與拔萃科時

戊

學使爲閣學周海山先生煌弟贊入縣學弟子員

三十一年丙辰三十三歲春北上應朝考日與玉山太史邱木亭給諫袁筠齋祭酒歐陽子石暨太史彭雲楣先生往還予石先生誼尤摯銓部劉幹齋先生薦赴原任李中協文英課徒得嘔吐疾跌坐旬餘就痊除夕前接毅庵先生書促歸侍養

三十二年丁亥三十四歲正月南歸

三十三年戊子三十五歲春毅庵先生依珠嶺開講席負笈遠從者恐後有初學未往者六人令從枚授學

仍賃暇樂園舊館攜兒捱往課

三十四年己丑三十六歲受業者日眾鉛山東鄉人文秀出生徒多有問難出意表者先大夫顧而樂之因常畱宿館中

三十五年庚寅三十七歲毅庵先生攜枚及贊赴省試九月八日省報領解謁房考朱椒圃先生先生曰早得夢兆仰見碧霄星斗斑斕有聲月中垂珠燈一盞抱入懷中二場擬墨詩有自有夜珠歸句臘月初趨裝北上毅庵先生訓曰從此當入仕途矣戒規及下

學工夫服官日守之再拜受教叩別父母行

三十六年辛卯三十八歲春闈成進士大總裁諸城相

國劉文正公觀副憲補亭先生莊少宗伯芳耕先生

房考鄧太史筆山先生 殿試二甲第十六名分部

學習引 見以刑部額外主事用恭逢 覃恩加一

級 誥封先大夫奉直大夫兩贈妣宜人本身封典

貤贈祖考妣十月長女適十都胡元倬

三十七年壬辰三十九歲二月接先大夫訃匍匐歸守

制房考椒圃先生遣使來唁招往鄱陽舟還途次黃

沙港聞陳太夫人病計水程紆緩舍之而陸隻身過

行時已暮誤入撒網山荒塚叠叠動輒顛履仰見星

斗爛然因從山墘越下尋得坦途衣履被污涉小圳

濯之衣可以風跌坐俟伴至山上若有人嚎聲有石

墜池中不之顧抵珠嶺晤毅庵先生與墀少憇趨輿

抵家侍醫藥就痊屬鄒乾中為先大夫覓塋地以鄒

得文超指南口傳晒得南鄉赦塢可避水蟻山距河

口五十里購之

三十八年癸巳四十歲昨歲抵家時贈妣泣述遺命謂

兒初得一官無俸養家先世買業豈容舍棄陳太夫人金太夫人皆謂然買業仍以孝敬兩歲以來僕僕道路籌貨以濟家難秋還自建陽寒熱交作誤服醫藥幾瀕於死改投回陽煖劑始痊
三十九年甲午四十一歲春正月附子毒發癰疥交潰支持牀蓐間廿餘日二月赴赦塢開墾係石山土穴合古遺法三月初三日葬贈考於赦塢之陽冬十月爲培聘候補縣丞黃君灝長孫女
四十年乙未四十二歲春趣裝北上四月抵蘇病發假

榻詹氏松風別墅又誤服發散劑嗽不止黎明更劇仍欲告歸侍養兩贈妣聞之畱墀從業師學命表姪韓蜚聲送莊夫人攜培壘至蘇趣行十一月抵天津值河凍就陸赴京派廣東司行走

四十一年丙申四十三歲三月廣東司滿郎中海齡員外郎圖山佈各立門戶釀案叅審海齡發新疆圖山佈綬候同司官員依不行舉察例降一級三月議下仍擬南歸侍養江西庚寅同年周太史厚轅等九人力阻南還襄金捐復仍歸刑部九月進署派歸山西

司行走

四十二年丁酉四十四歲四月派管提牢廳事大學士
英夢堂先生以十八司執法提牢職司恤囚訓之提
牢轄司獄官八南北兩監各五禁卒五百餘監內掌
櫃爐頭湯飯夫等以年久老犯充之夏給各監冰扇
冬給襖褲均於司獄收犯時散給否則各弊叢生放
飯係司獄專職司獄以虎頭門闕與提牢分限監犯
病提牢爲檢方藥給湯火貲監犯眾多時令禁卒燃
松枝大黃解疫南北監內外層牆環固內圍之牆三

面完整一面開窗外護柵欄禁卒輪班巡邏防範甚
嚴南五監半牆開窗用堅木作柵柱北五大監囚倍
之窗牖窄隘疫氣莫宣犯多病死提牢向北所四司
獄宣示堂諭以南監半牆開窗可法司獄皆躋之適
監候大員中丞海成廉訪廣德刺史琨玉及署外好
善者聞之樂輸恐後訪有工作建昌許仰甯行善樂
輸延辦是工兩月竣事許仰甯又以五間五厠坑夏
穢冬寒自願捐砌五監厠臺上開洩穢仄長口用板
掩蓋穢卸牆外監犯便之舊例斬絞遣犯每月初二

十六等日放家口進監探視各有閒房安頓爲恤囚
滋生計日久閒房被佔每監添造三四間給牌依次
出入是役也以夢堂先生恤囚一言豈非仁人之利

溥歟

四十三年戊戌四十五歲提牢報滿仍歸山西司與姜
同年開陽同主司稿右翼卷裕某白片行旂錢糧錯
誤改用印片更正爲都統叅奏發司審訊堂議照盜
用部印擬絞查右翼印信祇行所轄旂分與藩臬司
印同與部印通行直省者迥異況此案因查知白片

錯誤改用印片更正錢糧未放並非舞弊盜用可比
說堂定議卷裕獲邀末減改發新疆

四十四年己亥四十六歲三月題補山西司主事考差
獲與順天鄉試同考官出闈後堂派坐辦湖廣司事
有鑾儀衛奏交節慎庫虧空滋息銀兩案查自雍正
年間迄乾隆四十餘年計虧十餘萬兩每年屯租係
校尉赴屯收解交庫歷年旣久侵挪首犯早故從犯
罪止發遣贓難併計法輕情重反覆行查確審四閱
月稿始定奏上依議

四十五年庚子四十七歲恭逢 覃恩以本身封典

馳贈曾祖考妣 誥贈祖考奉直大夫祖妣宜人

誥贈考奉直大夫 誥封兩母宜人四月派赴總辦

處校勘秋審夏弟贊偕婦徐氏送培婦黃氏抵京完

婚毅庵先生病故設位哭奠迴憶廿餘年涉世服官

獲益甚多服當終身豈惟心喪三年已哉 校勘湖

廣司秋審有朱懷義逼姦胡氏將挾之逃胡不忍故

殺姦夫朱懷義該撫擬實杖以擅殺案改緩 校勘

械鬥命案撫看俱實內一犯某另樵各山非聽糾夥

黨仍作鬥殺改緩 校勘倉書楊學詩拳毆社長徐

輝絆跌門闕傷左太陽殞命該撫擬緩杖以楊學詩

賄作改傷鬥歐情輕舞弊情重改實堂議均從之冬

十一月題升安徽司員外郎辭兼山西湖廣兩司事

同邑蔣太史士銓臥疾京邸為校正醫藥訂晚歲交

賞送弟贊回鉛山侍養

四十六年辛丑四十八歲二月甘肅災賑案發提到甘

肅督勒爾謹派同軍機章京汪日章審辦會奏又派

入署值宿查辦甘省報案七月甘省解到逆犯呼韓

喇嘛等三犯派同司員英善解赴熱河行在交軍
機嚴審蘇四十三糾黨謀逆情形八月廿省請揀知
府八員枚甫擢員外與例未合夢堂先生首以枚名
咨送吏部馳赴熱河引見著馳驛往此受知之
始也九月廿四日抵省署督李相國侍堯檄下題補
平涼府知府欽差少司寇阿揚阿抵甘司員赫紳
泰牆見羹隨行聞監災賑案犯刑信十月朔稟辭赴
任次早出城至十里舖午後人至聞是日災賑案內
正法者十九員途次截刑者五員十月初十日抵平

涼查封前守彭永年財產次日入署任事郡多漢回
時搜緝新教甚嚴人懷反側值府試九屬童生無意
考取漢回三人作文武案首發案始知之眾心稍釋
本道汪觀察新奉署督委送貢使伯克進京過平
涼諭曰民欠卽是虧空應併案詳報枚有難色本道
以出自署督意抵靜甯州時業已通飭詳報不得已
聽之嗣本道旋省督藩皆非之值擢湖北臬司請委
枚兼護平慶道事飛調赴省臘月望後二日接道印
歲底接家信婢婦饒氏以產沒繼娶弋陽縣太學生

唐拱庚女

四十七年壬寅四十九歲正月京眷抵平涼署署督檢
查提省積案有甯朔縣軍犯高亮謀殺岳梅本管靈
州知州黎珠規避軍犯在配謀殺處分捏報武生張
業成因岳梅夤夜圖奸伊妻傅氏被殺傅氏不承又
改稱武生張翰因岳梅圖奸伊妻王氏被殺置謀殺
本犯於不論又令書役峻翰承認張氏一門兩婦被
污含冤莫雪委同涼州守富遜在臬司署審訊王氏
以頭觸地聲淚交迸訊及傅氏辱詈州官情更慘烈

臬司懷疑不釋同富守謁署督請委幹員以查渠爲
名乘府州縣不防潛赴甯朔縣提取原驗屍格軍犯
自首初供案始可定署督從之 升任汪道將民欠
誤作虧空案照例更正詳報具奏新任吉觀察天申
到省交卸道印辭回平郡步禱求雨不應訪得靈應
宮有龍湫出自崆峒山支派策騎涉涇河步禱龍湫
跪取餅水下山旋見崆峒後山起雲頃刻傾盆如注
入土五寸麥秋豐稔適奏部議互盤新例委赴慶郡
丈量城鄉倉糧訪不窟碑在慶郡東門外兩范舊治

坊樹於郡前慶屬民居田畝城堡關塞星羅棋布均
踞山顛下俱荒積乃秦隴六盤餘氣橫截東西宋時
藉以拒元昊者也城鄉倉糧丈量無虧具結詳報歸
次涇州接署督奏調蘭州信書覆公出日久涼郡命
案屆限者甚夥須訊結方可晉省請先委員署理五
月爲堽聘渭源縣知縣韓修鳳女時蘭州委王牧懿
憲暫署枚進省日署督詰何延緩答云平涼蘭州皆
屬郡得蘭州舍平涼逾限案不顧恐非憲意詢何時
接印答云王牧係軍機章京祇諳辦摺奏今獲署府

事正好練達審轉案牘似可不必汲汲交卸至平涼
屆限命案俱已詳解願駐省聽候差委署督色霽諭
俟部覆接印委枚審案甚多甯朔縣原驗岳梅屍格
及高亮自首初供提到與州府改填屍格迥異覆訊
高亮起衅謀殺情形與自首初供相符高亮依謀殺
斬候時前州牧黎珠已於災賑案內正法毋庸議隨
同改報吏曰某發新疆張氏一門冤抑頓雪兩武生
冤亦白 蘭州道陳觀察步瀛審訊擅殺案屍格三
樣解有三樣凶器署督疑有餘人加功履行飭駁密

諭審辦細檢屍格質訊鄰証夜聞喊賊眼同驗明牆
頭屋上俱有賊踪死係罪人訊鞠事主先用斧砍中
磨柄脫摸刀再扎磕碰傷俱在右面供勘既符亦無
加功餘人疑釋案結八月望前二日接適母陳太夫
人訃回平涼交卸一夜夢平野中有捲棚屋宇一宅
身跨捲棚脊上跌坐西時華岳陡峭幽曠仰見蔚藍
星斗灼灼有光胸次曠然十一月領咨歸里

四十八年癸卯五十歲正月抵西安至華陰換關外車
仰見華嶽忽符昨夢次日策騎進口步入金天初地

皆道院行六七里右壁皆坦道石上皆鐫刻顏歐柳
楷法目不暇接左壁山崖斜裂一大巖指爲陳搏穆
脩瘞骨處名心到此頓空又步行二十五里至莎蘿
坪華岳從平蕪蔓野中陡然矗起三石峯內一峯拗
折回顧向西北氣勢蒼莽莫可端倪夕陽西下百感
交集出潼關走陝州閩鄉過魯山次樊城改由水路
抵漢口換巨艦浮江溯湖始達南昌郝中丞碩授意
署守顧同年蔡廷司奏疏辭以秋杪歸抵河口泣敘
陳太夫人靈前呼搶罔極見金太夫人雙目俱瞽涕

泗交下不敢出聲匍跪膝前慰曰兒歸矣家中事有
兒當之金太夫人泫泫淚下頻以手磨頂頂諭曰努
力當之此境此情不堪具述守喪五日謁贈祖考妣
及先大夫塋出梳家難急走吳越越七旬歸分償客
欠及喪葬費冬十月入郝中丞幕獨居一院人事罕
通封印前一日出署宿心餘太史宅時太史方臥病
半體不仁夜間剪燭燕談歸至河口度歲是年改號
存甫

四十九年甲辰五十一歲三月治陳太夫人喪葬於朱

塋塋在張村西南山坪距河口五里穴寬大壙內開
有五色土無水蟻憂亦鄒乾中所卜陳太夫人安厝
左穴墓誌附穴前葬畢集戚串兄弟子姪檢先大夫
田地房產契券批交贊敬兩弟收管奉母買舟抵南
昌賃進賢門外周姓宅棲焉接甘省咨追軍需攤賠
銀兩秋走漳州向房考朱師貸千金歸繳賠欸

五十年乙巳五十二歲恭逢覃恩 誥贈祖考贈考

朝議大夫 誥贈祖妣嫡妣恭人 誥封生母恭人

春爲孫鏞聘南昌徐太學華聲女起咨補官立大宗

嗣孫過蘇州向友人詹廷重貨貫入京五月簡授河南汝甯府知府謝恩蒙詢刑部堂官優劣出身履歷諭有耕讀人家語又諭曰畢沅好巡撫定能調爾首府此二次受知也七月出京立秋日渡黃河畱省勘賑適南陽萬守甯卓異進京檄委往署遣舊僕楊壽往江西迎母就養十一月金太夫人抵南陽值卸事畱眷屬侍奉太夫人俟凍解迎赴汝甯五十一年丙午五十三歲春莊夫人侍太夫人抵汝甯署汝陽縣命案供証俱符縣詳未上屍親指詳翻

控檢閱卷宗初門有傷單再門屍傷無單訊出前後兩承經手傳初門書吏延久未到承辦再門書吏某倏從門外閃入叱曰此案是爾唆指翻控否則縣詳未上屍親何以得知吏汗如雨伏罪仍照原詳審解置吏於法三月初十日太夫人壽終享年七十有九詳報委員接署值郡城缺米一日價三昂幾罷市傳首縣至訊究閉糴重情枷懲遊市價漸平飛檄各屬出米處所迅運和糴郡城市價頓平越旬日武司馬先勝蒞汝接印治喪守制郡城不通舟楫陸路計

十餘程山徑崎嶇奉靈輻安抵漢口歸抵河口已十月初旬矣奉移宅中治喪與陳太夫人合葬十一月挈眷至南昌假城外蓼洲客舍度歲

五十二年丁未五十四歲正月二十六日培長子常錚生咳名四官惠民門官房承買修竣始有立錐地秋墀回鉛山應試補縣學弟子員陳觀察蘭孫以南昌郡志未成議開局捐修枚祖籍南昌贊成之辭不入志局

五十三年戊申五十五歲正月錚甫周晬便解識字暇日遊天壽寺後院幽僻可避城囂向寺僧租賃課讀祖孫父子集於一寺日執來氏易反覆玩索一日墀問吾父服官內外措施裕如何以屢遭家難動形竭蹶且認錯補過身任重累不辭余嘆曰持家與服官不同服官者權操於官公事公辦若一家之地難以法繩竭蹶不亦宜乎冬南昌府志成贈祖妣章太夫人得入賢母傳

五十四年己酉五十六歲正月服闋請咨攜培北上日將易學研究悟來子所著錯綜卦圖與通書陰陽互

根義相闡發繫辭卦非中爻不備玩勞謙君子爻詞
三四同功爲坎三五同功爲震艮爲山止象坎陷震
動有出坎象震動知止有勞謙象改號謙山過湖口
訪同年周篤堂江行阻風蕪湖訪陳藥堂太守步遊
攝山以幽居勝舟行一月渡黃北轍抵河間途次值
蔣生知廉孝服來聞心餘太史周海山先生訃抵京
謁海山先生靈撫棺哭之選補順德府知府謁劉總
督峩於都門次日 召見總督 諭有昨見順德府
知府光景好爾應調他保定語此三次受 知也六

月抵任郡九屬邢台令成邦直浮派協濟差費鮮有
應者減數而後各屬應之內邱疲敝已極左令維鎰
官親干與公事嚴飭驅逐門僕馮某私娶部民孀婦
發首縣查究平鄉令韓濤四川舉人有守有爲任縣
令李某山西舉人辦事結實稱兩令以勵各屬赴廣
平勘災適韓修鳳令永年訂娶婚期又赴冀州勘災
委署保定赴省值王守汝璧畱任辦賑不果接篆九
月眷屬抵署余向患胃疾發則坐臥不甯南昌彭醫
傳授臘八日赴山取菟血製丸連服數次下有長五

寸許闊寸許積塊胃疾遂瘳

五十五年庚戌五十七歲二月赴趙北口辦東巡差務尋回任墀來爲錞啟蒙奉廉訪阿精阿檄調省赴滿城求禱龍湫得雨委訊六疑案晝夜研鞫分別定讞廉訪赴臨洺關接差沿途查驗順德差務郡守責尤重星夜兼程馳歸飭令內邱協濟車馬趕赴北關候驗整肅公館平墊道路邢台亦然廉訪入境優獎是役也公相福康安送阮光平北來入廣平境渡洺河渡船幾覆丁本道曰順境沙河有熊知府料理可

保無恙先遣僕報知公相偕阮光平抵順境沿河俱有營兵水夫伺應抵沙河營兵水夫護送過河如履坦道公相遣僕慰勞周至七月蒙恩擢山東濟東泰武臨道十月抵任邢台幕友成奎中諳城工延赴道署惠中丞麟江方伯蘭陸廉訪有仁先後到任夏津邱縣兩屬初限城工城門不能關閉令成友馳往更正始報工竣

五十六年辛亥五十八歲正月既望豫省糧船方駐德州守凍委赴積催又奉新例委赴臨清盤查守凍銅

言山行全錄
船撫劄嚴甚逐查各船銅簍係昨歲未奉新例前經
湖北委員盤驗改載以致船口銅簍與冊不符仍照
冊抽查改載銅簍無虧催僨出境歸勘二限十五屬
城工偕成君於酷暑烈日中逐處牽繩丈量據實估
勘悉杜諸弊按屬繪圖依限興工東阿縣城中隔
狼溪河城形兩半月舊制也議者紛更諸多隔礙細
加履勘仍遵舊制禦險全在兩涯泊岸抵禦溪漲沖
刷中設石橋舊分數涵洞宣洩洪漲無庸勘估惟兩
城三面有垣中間兩面向未築牆原勘估冊亦未議

及覆估增築兩牆中開兩門以資兩城啟閉議上報
准秋壘夫婦來前此入贅於韓永年也冬惠中丞麟
去任吉中丞慶巡撫山東

五十七年壬子五十九歲夏直隸河南兩省截留漕米
俱在臨清截兌 欽差劉倉督秉恬駐劄臨清直隸
奏派大名丁觀察濼深收兌河南奏派劉觀察文徽
收兌山東奏派枚監兌兼催糧船北上各船旗丁舞
弊摻和霉變枚懲丁封艙給以風車限扇淨兌交丁
觀察由陸路運赴直屬劉觀察由水運回豫臨清歲

旱衛河水涸閘外桅檣排插三十里用繁露法虔禱
漳王廟甘澍渥沛衛河水漲十三幫糧船浮送出境
未幾衛河又涸閘內糧船五幫銅船一幫未能出閘
閘外糧幫如前停泊沈觀察啟震赴王家港催運值
管漕帥幹楨押運北來與吉中丞俱駐臨清漕帥見
閘外停泊糧船飭漕委啟閘通漕濟運向來通漕者
閘外停泊船少閘內亦無多船尚易浮送否則啟板
洩盡閘水閘外糧船不能浮送閘內糧銅各船淺擱
沙灘載重船裂地方官干罪重大枚急止漕委將已

啟九板暫且下閘免水洩盡趨告漕帥幸獲中止旋
值豫省得雨浮送出境秋充文闈監試

五十八年癸丑六十歲正月十一日 恩擢江蘇臬司
時吉中丞委兼署運使印務運庫應追歸欵者多奏
請展限一月追繳諸欵道屬城工亦報竣交卸道運
兩印進京 陛見 諭趕赴勘秋審四月杪抵蘇臬
任秋審情實四十二起部俱照實無改緩改實案緩
改矜一起 吳江楊家港張家田兩村居民濱臨太
湖出沒肆竊夥黨漸多恐養癰成患密陳其狀於奇

中丞豐額委陳倅夢蘭飭同江震兩令會緝獲四十八犯分五案照積猾例遣發新疆閭門外布號晒匠四千餘人係督糧同知管轄動輒停晒構訟滋索添價親帶該丞馳往拏獲滋事首從數人斥逐遞籍管束頽風遂息虎邱亦該丞管轄地方商賈雲集挾其餘貲淫巧百出亦有攜妓提壺往遊者欽奉聖諭以富商餘貲養活無產手藝貧民亦以工代賑之意惟嚴飭該丞限以二更爲率違限及滋事分別懲示是年授錫十三經立課程師嘗以大樹將軍出

對應聲答曰瘦羊博士時錫七歲師以穎異器之

五十九年甲寅六十一歲夏總督書麟離任大司寇蘇凌阿赴徐州審案卽署兩江總督年已八十餘蘇臬秋審情實三十六起部均照實無改緩改實案矜改緩一起碭山邪教案發由黃河南岸馳赴先是安徽太和縣劉之協倡興邪教蔓延陝甘河南各省碭山與太和咫尺今邪教案發意爲劉之協夥黨率同徐守灼晝夜窮詰搜查各犯家內均無劉匪案內所傳歌詞飛咨豫皖兩臬司據覆劉案夥黨並無碭案

犯名通稟督撫兩院請卽具摺奏報回次高郵接署
督札奏調赴太和協緝劉之協一面稟知奇中丞一
面往太和進發署督至太和據皖省司道及十府朱
糧道一邊語叅奏河南扶溝縣疎縱劉匪時皖藩周
樽護撫印奏獲劉之協傳徒六犯及新任陳中丞用
敷又據縣丞吳棫稟獲任梓等六十一人起有命根
錢單指爲劉之協夥黨陳中丞先行入奏周護撫摺
後發枚以叅奏扶溝疎縱出自安徽司道左袒言未
可憑信署督業已叅奏無可挽回至任梓等六十一

人出自縣丞吳棫妄語案關教匪生死出入不可不
慎乃晉謁署督緩頰言之署督卽委專訊此案及周
藩司奏獲劉之協傳徒六犯稟委潁州同知張護隨
同確審訊據六犯內有供認傳徒入教者供証俱符
照例斬決未傳徒者發黑龍江迨提任梓等犯審訊
極口呼冤悉心研詰其命根錢單乃係賀喜禮單提
取卷宗一係娶婦送賀禮紅帖一係嫁女送賀禮紅
帖案內羅織六十餘人皆兩帖內送禮有名者再提
劉匪傳徒六人與任梓等質認皆供素不認識偕張

護同見署督稟請與陳中丞會審無異連銜具奏聲
明任梓並非劉匪夥黨惟家供彌勒佛像發充邊遠
軍餘均省釋冬月杪回臬司任

六十年乙卯六十二歲春碭山邪教案依左道惑人例
分別首從定擬入奏秋審情實案犯二十八起經部
照覆無改緩改實改矜案五月署督奏委接署藩司
印旋奉 恩旨擢授雲南布政使畱署蘇藩夏蘇州
久旱城河井水皆涸隨同護院步禱甘澍下沛穹窿
山向無水田奸民唆指羣佃爲賴租計乘余赴院時

集有四五百人圍繞署前攔輿報旱廉得其狀傳老
民二十餘人愷切曉諭令出諭羣佃散去密遣役拘
首事數人交蘇府究治 蘇州各屬倉穀缺額未補
趁江北高寶及上江廬州一帶年歲豐稔穀價平減
嚴飭各守牧飭屬採買迅補額穀又緩地丁不催惟
補倉穀是務密探鎮江京口蘇州泔墅日報有採買
穀船陸續入境入關復劄飭守牧嚴督採買不使鬆
懈 松江陳提督據營弁稟指商船張茅等爲盜船
冒昧入 告營弁楊天相擢陞副將沈長發擢陞參

將署督馳往勘驗訊有冒功誣指情弊飛咨閩浙兩
省閩省覆到確係商船有縣給牌票出口號簿可憑
浙省解有盜械盜盜與所指械盜迥異其為冒功誣
指無疑劄飭藩臬兩署司會訊具摺奏營弁冒功
誣良張茅等省釋楊天相擬發新疆沈長發擬充徒
役陳提督革任奉 嚴旨楊天相改斬決沈長發改
絞監候陳提督枷號三月示眾 秋九月費中丞淳
蒞巡撫任蘇州府李廷敬稟請興濬城河發司議准
遴公正縉紳五人董濬工務不准三縣胥役干與議

捐項以千貫以上為上戶五百貫以上為中戶各聽
樂輸餘皆下戶議免捐輸適中丞赴豐堡勘災李守
擢陞松太觀察議幾寢枚乃訂期傳上中戶四十餘
紳至可園各令書數於簿計上戶中戶輸三萬餘金
其典當商輸三萬餘金城河以三橫四直為要津應
行興挑餘支免濬民居既安費用亦省工竣計費三
萬餘金剩銀二萬餘飭交蘇府修理泇墅尹山一帶
石橋石堤 太倉劉河為婁江入海要道年久淤與
壤平州牧鰲圖援業食佃力例詳借地丁與挑分三

言山行年錄
年徵收歸欵上其議於中丞具摺奏聞遣鑄回
南昌入贅徐氏十一月十九日培次子常鎬生咳名
少白南昌祖籍族譜自明嘉靖太僕寺卿汝器公修
後越二百數十年未修校於去年書致祖籍取到舊
譜十二匣延吳中名手纂修增入繼續世系刪去舊
譜附會以宋龍圖閣待詔本公爲始祖今秋工竣計
十五匣交贄攜回十四匣河口存一餘寄祖籍夏溪
劉城新港等族分貯

嘉慶元年丙辰六十三歲恭逢 聖聖相承體元錫類

覃恩普沛 誥贈祖考贈考通奉大夫祖妣兩贈

妣夫人本身妻室始與 封長子輝亦仰邀 恩蔭

例考光祿寺署正買舟北上莊夫人令壩子常錯畱

蘇署撫教從之正月守牧來謁諭曰舊冬各屬收漕

墊辦多費故不催解地丁今歲二月後漕已兌竣正

值催徵漕尾時地丁自應趕緊報解且各有剩餘銀

兩計數不費與其無益浪費何如歸作節省項下於

公有裨眾以爲然屆期照數解司察有地丁不敷者

將節省詳發還換解地丁詳作抵查丹徒丹陽地丁

三山全錄
三
欠解甚多將節省項下剩銀十二萬撥八萬抵解丹
徒地丁撥四萬抵解丹陽地丁取具兩屬撥抵印結
存據雖出權宜而不離乎正倉穀既補地丁全解四
月廿日後謁中丞中丞赴邗審案適浙江糧船水手
入蘇肆擾署督委蘇守馳往彈壓撥三縣壯丁三百
營兵艦百獲首從三十餘人事遂定 前飭各屬報
買倉穀料知買額未足馳往吳江盤驗尙缺千石立
鎖倉書斗丁及僕交蘇府嚴究密查泔墅又有各屬
穀船陸續入關吳江穀旋補足倉書等釋歸隨往盤

查各屬有添造新廩可驗者有倉廩不敷借貯科房
者逐丈屬倉俱足額司具倉穀無虧印結詳報兩院
存案 蘇州銅局官商係天津范商領帑承充每歲
運腳八萬兩亦天津鹽商協濟蘇州民商係王履階
自備資本出洋採買供蘇局鼓鑄乙卯夏天津鹽院
因范商虧帑疲乏奏交蘇省遴商承充移知到司赴
院謁中丞歷陳此例一開諸弊叢生范商卽是前鑒
今天津以鄰爲壑豈容束手待斃貽害地方中丞以
爲然展轉咨查軍機天津知難推委丙辰冬發司安

議司議上院以不領官帑遊上戶四家各借民商工
履階銀四萬作本議五年歸還銀不起利將官商歸
併民商出洋採買可供各省鼓鑄銅劬至運腳無費
應聲明奏請各省委員赴蘇領銅既免官商領帑又
免另籌運費蘇州商民俱得蒙惠安業中丞照議詳
奏適新任藩司西成到任交卸署司印務具摺奏報
起程赴滇日期忽署督與中丞會銜奏留仍留蘇州
督濬劉河

二年丁巳六十四歲正初馳赴劉河開工概屏工員供

應州牧鰲圖援業食佃力例估借地丁銀七萬兩原
照河底丈尺詳請入奏其久淤浮土丈餘未入估冊
查婁江下游由劉河入海計淤土丈餘長三十二里
工大費繁豈能官爲開挑沿河民田服疇蒙利自應
仍就州與屬縣所隸地方分段劃界各率界內業佃
按段興挑又立水平作準以挑至河底石塊爲率其
沿河各橋以六度橋爲衡凡有淤礙潮水橋腳悉令
州縣官捐貲拆造計官民捐貲五十餘萬俱不在入
奏估冊內閱六旬工竣三月十二日工次接奉 上

諭熊枚着調補安徽布政使欽此拜摺謝恩聲明
工竣赴任二十日費中丞收工四月初三日培三子
常銑生咳名皖初十二日抵安藩任向例藩署米薪
油炭分屬供應概行裁汰教各署用煤作爨法較薪
炭省數倍安慶之解用煤由此始也安藩交代冊
內有元年壽州營總兵定柱奉旨駐劄三道河及
潁州六安宿松等處撥兵防守項下提借司庫匣費
穀價銀至十一萬有奇未詳兩院入奏庫款虛懸
干咎重大嚴飭局員張守灼等查覆得准銷准歸二

欵詳請兩院咨部立案其無着一欵計銀三萬八千
兩零前護院前司於冊內均未分晰註明並飭張守
等照依註冊張守請扣文員養廉按官階大小正署
各分五等按月扣捐二成限三年歸欵如續有巡防
等費及部駁不准銀數再照攤捐時皖省尙無攤扣
欵目今分五等酌捐二成爲數無幾易於按季扣抵
不礙辦公又在不准扣廉例前庫欵從此有着歲
旱朱中丞珪率屬步禱卽日大雨桐城等處豐收他
若廬屬合肥鳳屬定遠一隅旱災廬之巢縣滁之全

來等縣鳳之壽州勘未成災適接蘇省清河令稟有
碭山漫口語中丞扎委往勘值碭口掛淤宿靈等屬
被水成災先辦急賑中丞卽以入告奉 上諭着加
恩將宿州靈璧泗州五河盱眙五州縣成災民衛戶
口賞給一月口糧該五州縣勘不成災地畝及鳳屬
之鳳陽懷遠壽州鳳臺等州縣勘已成災之民衛莊
村應徵新舊銀米一併緩至明年秋成後開征當經
恭錄謄黃頒給曉諭飭動常平倉穀急賑一月口糧
接奉部文欽奉 上諭刑部右侍郎員缺着熊枚補

授欽此十月二十日交卸十二月十四日謝 恩請

訓到刑部右侍郎任

三年戊午六十五歲孫錚誦畢十三經時年十二歲

四年己未六十六歲 皇上於忠正殿 孝廬召見轉

補刑部左侍郎恭逢 覃恩加一級請封贈曾祖考

贈祖考贈考 誥贈榮祿大夫贈曾祖妣贈祖妣兩

贈妣 誥贈一品夫人本身封典 馳贈大宗長伯

考妣

五年庚申六十七歲十一月墮分發陝西軍營效力期

滿題請借補渭南縣縣丞壩加捐同知

六年辛酉六十八歲六月直隸水災奉 旨暫署直隸

總督七月交卸奉 命周查災賑兼審控案九月

擢都察院左都御史時抵河間府查賑拜摺謝 恩

十二月旋京復 命 恩賜紫禁城騎馬

七年壬戌六十九歲正月戴可亭閣學延蕭山湯太史

金釗開講席令錞往受業三月蟬次子生咳名佛寶

充壬戌會試正總裁閱卷甫竣四月初二日奉

命暫署直隸總督是時尚未揭曉 命先出闈亦異

數也署任二月直督顏檢到任交卸後遵 諭馳赴

景州霸州等處地方督捕蝗蝻竣事復 命八月

恩擢刑部尚書兼署左都御史十月兩淮運司會賓

谷都轉送女來京與錞完姻

八年癸亥七十歲孫常錯聘休甯詹澤遠長女

九年甲子七十一歲九月調都察院左都御史兼管理

三庫事除夕前一日莊夫人病終壽七十有四五十

四年夫婦一朝永訣悼何如也

十年乙丑七十二歲正月調工部尚書兼署刑部尚書

六月奉旨暫署直隸總督駐長安城防汛七月回
工部尚書任又蒙恩賜景運門外乘坐肩輿正月
孫錞育曾孫男咳名會寶二月莊夫人停厝萬柳堂
五月墀三子生咳名大廣七月墀以丁母憂故回鉛
山本籍

十一年丙寅七十三歲四月卸署刑部尚書事五月調
都察院左都御史九月直隸藩司書吏假印舞弊侵
盜庫銀案發部議革職蒙恩以四品京堂補用十
一月初三日補授順天府府丞冬月輪應府丞季考

赴金臺書院九月錞育曾孫女鵬月墀攜孫常錯赴
蘇爲錯入贅計

十二年丁卯七十四歲正月通州考竣旋京二三月間
課金臺書院生童兩次四月錞回籍鄉試以府丞應
充鄉試提調錞當迴避故也五月季考七月充提調
官考繙譯八月初六日入棘闈充提調官順天府治
中戴修齡承辦分棚賣卷送尹用印遲延一日督學
使者國子監試冊係移交府尹飭造糧廳袁輝造冊
舛錯內多有名無卷者他若旂漢貝皿官民等冊與

糧廳底冊校對不符有礙中額是時至公堂洽如亂
絲提調官惟防誤考不能他及初八日點名日午後
請於監臨府尹處剩有多餘試卷速提入闈給無卷
諸生免誤考事卽作移會請府尹帶印迅至龍門外
補用印卷給發無卷諸生考尙未誤其糧廳查造員
皿官民底冊提到至公堂核校封貯未發提調官明
知提卷用印補給考生事例應奏 聞監臨監試旣
不使提調官與知提調例應迴避不得過問監臨監
試會銜叅奏後十三日奉 旨提調年老弛懈未能

先事督催亦應交部嚴議實出咎所應得是時提調
官遲延舛錯處分已甘身任可以無庸迴避矣十四
日請於監臨將貝皿舛錯封貯底冊交府尹更正廿
二日府尹更正十六卷移覆至公堂知照內簾廿六
日奉 上諭賞給五品京堂休致新任徐提調如澍
入闈枚向 闕謝 恩交印廿七日出闈十月初四
日江西提塘接省報孫錞獲中南闈鄉試第十六名
舉人三世邀 榮銜 恩無極伏思枚一介下士仰
蒙 皇上逾格 殊恩三任都察院左都御史管理

三庫刑工兩部尙書兼兵部尙書三署直隸總督
恩賞紫禁城騎馬又 恩賞景運門外乘坐肩輿
寵眷疊施至優極渥近以年老衰庸屢干嚴議中夜
撫心戾由自取復蒙 垂念格外矜全 賞給五品
京堂從此優游林下遂其餘年皆出 高厚鴻慈所
賜感慚交集實無津涯惟訓世世子孫戴 帝則之
耕讀承清白之家訓繼述志事勉學踐履篤實此則
紀是錄之意歟嘉慶丁卯十月立冬後三日三泉七
十有四歲老人枚手自編紀

跋

先大司寇手編行年錄一卷起雍正甲寅訖嘉慶
丁卯凡七十有四年自勝衣就傅遊學成名至於
立朝中外游登卿長凡所經歷釐然備載蓋 公
以寒畯力學勤勤踐履之際自壯至老夷險更塗
每事必詳察而審行默識而覆驗期無疚於心可
告於世其言不施藻飾要以深自證課反求篤行
之本此其志也 公中歲通籍旋遭註誤欲退者
屢矣同時朝士共相勉勗遂自秋曹出典大郡周

言山行年錄
歷監司遭遇

睿皇初政自外藩登進
孝廬引對參與密謀遂蒙委任
恩數稠疊獨以失察一藩吏追落數官責降京丞仰見
當時法令嚴明不以大臣重望而有所詭曲如此
乎其不可恃也洎乎京兆印卷之役責可旁誘而
爲人受過引退恬如後之人觀於黜陟之際則知
先帝賞罰之公平原其得過之繇則知公處心之忠
厚雖易名之典闕用弗彰而勲在

國史心跡炳然可考而知也

嘉樹既栞

公詩文秦

議若干卷因拾此編並付梓人俾後禩子孫無忘
先志之兢兢云爾咸豐五年歲在乙卯仲秋之月
曾孫嘉樹盥手謹識



會歷最極盛乎新編

夫志之難成者莫如學正乎欲其成也則必先志其
新者乎然則今世之學也其非人對其志不其難也

國史合編疏然百世而後其志當與樂 公特文奉

